

大智度論卷第十

傅十

龍 樹 菩 薩 造

姚秦三藏法師鳩摩羅什譯

釋初品中十方諸菩薩來之餘

經寶積佛報普明言善男子西方度如恒河

沙等世界有世界名娑婆是中有佛號釋迦

牟尼今現在欲為諸菩薩摩訶薩說般若波

羅蜜是其神力

論問曰佛譬如須彌山不為大海水波所動

今何以答普明是則動相攝心則無語散心

則有說說法從覺觀生覺觀麤事佛不應有
此麤事答曰佛雖入深禪定不為世事所動
今以大慈悲心憐愍眾生為之說法斷疑如
須彌山王小風則不能動若隨藍風至則大
動散佛亦如有大慈悲風來憐愍心動散
身無數入五道教化眾生或作天身乃至畜
生復次佛實不動常入禪定先世福德因緣
故身遍出聲應物如響如天妓樂自然發聲
又如摩尼珠隨人所欲種種與之若欲衣被
飲食醫藥自恣所須自然皆得佛亦如是從

其身邊諸毛孔中自然有聲隨心說法是中佛無憶想亦無分別如說密迹金剛經中佛有三密身密語密意密一切諸天人皆不解不知有一會衆生或見佛身黃金色白銀色諸雜寶色有人見佛身一丈六尺或見一里十里百千萬億乃至無邊無量遍虛空中如是等名身密語密者有人聞佛聲一里有聞十里百千萬億無數無量遍虛空中有一會中或聞說布施或有聞說持戒或聞說忍辱精進禪定智慧如是乃至十二部經八萬法

聚各各隨心所聞是名語密是時目連心念欲知佛聲近遠即時以己神足力去無量千萬億佛世界而息聞佛音聲如近不異所息世界其佛與大衆方食彼土人大目連立其鉢緣彼佛弟子問其佛言此人頭蟲從何所來傳十著沙門被服而行其佛報言勿輕此人此是東方過無量佛界有佛名釋迦牟尼此是彼佛神足弟子彼佛問目伽路子度汝何以來此目連答言我尋佛音聲故來至此彼佛告目連汝尋佛聲過無量億劫不能得其邊

際復次佛出世爲斷衆生疑故爲說法此不應難汝不應問曰何以除暗佛亦如是不應問佛何以故答問曰諸佛等故名爲等覺今何以稱言是彼神力答曰示無吾我彼此滅嫉慢故復次世界有天常求尊勝憍慢法故自言天地人物是我化作如梵天王謂諸梵言我作汝等毗紐天言世間有大富貴名聞人皆是我身威德力分我能成就世間亦能破壞世間世間威德皆是我作有如是天破因緣法相諸佛實語不壞因緣法相故言是

彼佛神力

經是時普明菩薩白寶積佛言世尊我今當往見釋迦牟尼佛禮拜供養及見彼諸菩薩摩訶薩紹尊位者皆得陀羅尼及諸三昧於諸三昧中而得自在

論問曰若諸佛持戒禪定智慧度人皆等是普明菩薩何以欲來見釋迦牟尼佛答曰諸菩薩常欲見佛無厭足聽法無厭足見諸菩薩僧無厭足諸菩薩於世間法皆以厭患於上三事心無厭足如手居士從淨居天來欲

見佛其身微細沒失譬如消蘇不得立地佛語手居士汝化作羸身觀此地相居士即如佛言化作羸身觀念地相頭面禮佛足一面立佛問居士汝幾事無獸生淨居天答言我三事無獸生淨居天一見佛供養無獸二聽法無獸三供給僧無獸如佛在閻浮提四部衆常隨逐佛聽法問法是我淨居諸天亦常從我聽法問法聲聞猶尚聽法無獸足何況法性身菩薩以是故普明菩薩來見釋迦牟尼佛及見此間諸菩薩摩訶薩紹尊位者皆

得陀羅尼及諸三昧如先讚菩薩品中說於諸三昧而得自在者問曰如佛一人一切三昧中得自在何以言菩薩亦一切三昧中得自在答曰有二種三昧一者佛三昧二者菩薩三昧是諸菩薩於菩薩三昧中得自在非佛三昧中如說諸佛要集經中文殊尸利欲見佛集不能得到諸佛各還本處文殊尸利到諸佛集處有一女人近彼佛坐入三昧文殊尸利入禮佛足已白佛言云何此女人得近佛坐而我不得佛告文殊尸利汝覺此女

人令從三昧起汝自問之文殊尸利即彈指覺之而不可覺以大聲喚亦不可覺捉手牽亦不可覺又以神足動三千大千世界猶亦不覺文殊尸利白佛言世尊我不能令覺是時佛放大光明照下方世界是中有一菩薩名棄諸蓋佛十即時從下方出來到佛所頭面禮佛足一面立佛告棄諸蓋菩薩汝覺此女人即時彈指此女從三昧起文殊尸利白佛以何因緣我動三千大千世界不能令此女起棄諸蓋菩薩一彈指便從三昧起佛告文殊

尸利汝因此女人初發阿耨多羅三藐三菩提意是女人因棄諸蓋菩薩初發阿耨多羅三藐三菩提意以是故汝不能令覺汝於諸佛三昧中功德未滿是棄諸蓋菩薩三昧中得自在佛三昧中少多入而未得自在故耳

經佛告普明欲往隨意宜知是時爾時寶積佛以千葉金色蓮華與普明菩薩而告之曰善男子汝以此華散釋迦牟尼佛上生彼娑婆世界諸菩薩難勝難及汝當一心遊彼世界

論問曰佛何以言欲往隨意宜知是時答曰佛於弟子愛斷故於弟子中心不著故復次是菩薩未得一切智未得佛眼故心中少多有疑謂釋迦牟尼佛功德大所益或勝是故語言欲往隨意復次是菩薩遙見釋迦牟尼佛身小心生小慢言彼佛不如是故佛語汝往莫觀佛身勿念世界但聽佛說法復次是世界離娑婆世界極遠最在東邊是菩薩聞釋迦牟尼佛所說諸法相與寶積佛說諸法相正同便言世界雖遠法相不異增益大信

心轉堅固復次先世因緣故雖遠處生應來聽法譬如繩繫雀脚雖復遠飛攝之則還復次是娑婆世界中菩薩見普明遠來聽法便作是念彼從遠來況我生此世界中而不聽法如是種種因緣是故佛言欲往隨意宜知是時問曰諸佛力等更不求福何故以華為信答曰隨世間法行故如二國王力勢雖同亦相贈遺復次示善轉心故以華為信世間法中使從遠來必應有信佛隨世法是故致信復次諸佛恭敬法故供養於法以法為師

何以故三世諸佛皆以諸法實相為師問曰
何以不自供養身中法而供養他法答曰隨
世間法如比丘欲供養法寶不自供養身中
法而供養餘持法知法解法者佛亦如是雖
身中有法而供養餘佛法問曰如佛不求福
德何以故供養答曰佛從無量阿僧祇劫中
修諸功德常行諸善不但求報敬功德故而
作供養如佛在時有一盲比丘眼無所見而
以手縫衣時針袵脫便言誰愛福德為我袵
針是時佛到其所語比丘我是愛福德人為

法相來是比丘識佛聲疾起著衣禮佛足白
佛言佛功德已滿云何言愛福德佛報言我
雖功德已滿我深知功德因功德果報功德
力今我於一切眾生中得最第一由此功德
是故我愛佛為此比丘讚功德已次為隨意
說法是比丘得法眼淨肉眼更明復次佛雖
功德已滿更無所須為教化弟子故語之言
我尚作功德汝云何不作為技家百歲老公
而舞有人呵之言老公年已百歲何用是舞
公答我不須舞但欲教子孫故耳佛言如是

功德雖滿為教弟子作功德故而作供養問曰若爾者佛何以不自遙散釋迦牟尼佛上而遣人供養答曰為此間諸菩薩信普明故復次佛所遣使水火兵毒百千種害終不能傷道里懸遠欲令安隱故問曰何故不以好寶深經若佛菩薩寶言此寶諸入所不見能出種種妙物如摩尼珠故名佛寶也為信而以蓮華蓮華小物何足為信答曰佛不須物佛寶天寶尚亦不須何況人寶以不須故不遣亦以佛自等有故不遣深經亦爾復次諸經於佛則無甚深甚深之稱

出自凡人凡人所疑於佛無礙凡人所難佛皆易之復次華香清妙宜為供養如人獻贈必以異物問曰何故止以蓮華不以餘物答曰供養唯以華香播蓋華有二事有色有香問曰餘華亦有香有色何故唯以蓮華供養答曰如華手經中說十方佛皆以華供養釋迦文佛復次蓮華有三種一者人華二者天華三者菩薩華人華大蓮華十餘葉天華百葉菩薩華千葉彼世界中多有金色光明千葉蓮華娑婆世界中雖有化華千葉無水生

者以是故遣是蓮華千葉金色如上舌相中
說問曰佛何以令普明以華散佛上答曰供
養法華香旛蓋旛蓋應上乾香應燒濕香應
塗地末香及華應散問曰何以不供奉而已
而自散上答曰自手供養是身業輒言問訊
是口業能起身口業是意業是三業得功德
牢固與佛道作因緣問曰何以言汝當一心
敬慎娑婆世界中諸菩薩難及難勝答曰佛
辟支佛阿羅漢一切諸賢聖皆一心敬慎魔
若魔民及內身結使種種先世罪報皆是賊

近此諸賊故應一心敬慎譬如入賊中行不
自慎護為賊所得以是故言一心敬慎以遊
彼界復次以人心多散如狂如醉一心敬慎
則是諸功德初門攝心得禪便得實智慧得
實智慧便得解脫得解脫便得盡苦如是事
皆從一心得如佛般涅槃後一百歲有一比
丘名憂波耆得六神通阿羅漢當爾時世為
閻浮提大導師彼時有一比丘尼年百二十
歲比比丘尼年少時見佛憂波耆來入其舍
欲問佛容儀先遣弟子弟子語比丘尼我大

師憂波耄欲來見汝問佛容儀是時比丘尼以鉢盛滿麻油著戶扇下試之知其威儀詳審以不憂波耄入徐排戶扇麻油小棄坐已問比丘尼汝見佛不容貌何似爲我說之比丘尼答我爾時年少見佛來入聚落衆人言佛來我亦隨衆人出見光明便禮頭上金釵墮地在大暗床下佛光明照之幽隱皆見即時得釵我自是後乃作比丘尼憂波耄更問佛在世時比丘威儀禮法何如答曰佛在時六羣比丘無羞無恥最是弊惡威儀法則勝

汝今日何以知之六羣比丘入戶不令油棄此雖弊惡如比丘儀法行住坐卧不失法則汝雖是六神通阿羅漢不如彼也憂波耄聞是語大自慚愧以是故言一心敬慎一心敬慎善人相也復次何以故言一心敬慎是菩薩難勝難及難破難近譬如大師子王難勝難破亦如白象王及龍王如大火炎皆難可近是菩薩大福德智慧力故若人欲勝欲破是不可得正可自破是故言難近問曰一切大菩薩皆大功德智慧利根一切難近何以

獨言娑婆世界中菩薩難近答曰實如所言
但以多寶世界中菩薩遠來見此世界不如
石沙穢惡菩薩身小一切衆事皆亦不如必
生輕慢是故佛言一心敬慎彼諸菩薩難近
復次樂處生人多不勇猛不聰明少智慧如
鬱怛羅越人^{佛十}以大樂故無出家無受戒諸天
中亦爾是娑婆世界中是樂因緣少有三惡
道老病死土地自活法難以是故易得獸心
見老病死至心大獸患見貧窮人知先世因
緣所致心生大獸以是故智慧利根彼間善

薩七寶世界種種寶樹心念飲食應意即得
如是生獸心難是故智慧不能大利譬如利
刀著好飲食中刀便生垢飲食雖好而與刀
不相宜若以石磨之脂灰瑩治垢除刀利是
菩薩亦如是生雜世界中利智難近如人少
小勤苦多有所能亦多有所堪又如養馬不
乘則無所任復次是娑婆世界中菩薩多方
便故難近餘處不爾如佛說我自憶念宿世
一日施人千命度衆生故雖諸功德六波羅
蜜一切佛事具足而不作佛恒以方便度脫

衆生以是事故是娑婆世界中菩薩難近

爾時普明菩薩從寶積佛受千葉金色蓮華與無數出家在家菩薩及諸童男童女俱共發引

論問曰是普明菩薩大力神通故應能來是出家在家菩薩及諸童男童女云何自致多寶世界最在東邊道里悠遠是自用力行爲寶積佛力是普明菩薩力耶爲釋迦牟尼佛力答曰盡是四種人力是出家居家菩薩或是不退五通成就菩薩四如意足好修先世

釋迦牟尼佛因緣亦自用己力亦是普明菩薩力何以故是中力勢薄者是普明菩薩力故得來如轉輪聖王飛上天時四種兵及諸宮觀畜獸一切皆飛轉輪聖王功德大故能令一切隨而飛從此亦如是力勢薄者以普明菩薩力故皆亦得來亦是寶積佛力及釋迦牟尼光明照之若自無力但釋迦牟尼佛光明照之亦應能來何況有三問曰是普明菩薩何不獨來而多將衆人答曰翼從所宜故譬如國王出時必有營從復次是普明善

薩及釋迦牟尼佛因緣人故所以者何彼大衆中二衆共來是故知有因緣者來無因緣者住問曰是菩薩何以故與諸居家出家童男童女俱來答曰佛弟子七衆比丘比丘尼學戒尼沙彌沙彌尼優婆塞優婆夷優婆塞優婆夷是居家餘五衆是出家出家在家中更有二種若大若小小者童男童女餘者爲大問曰大者應行小者何以能來答曰在功德不在大小若失功德利行不善法雖老而小若有功德利行善法雖小而大復次見此

小者遠來人見則歎小而能爾爲法遠來亦顯佛法小大皆得奉行外道法中婆羅門得行其法非婆羅門不得行佛法無大無小無內無外一切皆得修行譬如服藥以除病爲主不擇貴賤大小

經皆供養恭敬尊重讚歎東方諸佛

論問曰若皆供養東方諸佛諸佛甚多何時當訖得來此間答曰是諸菩薩非作人天法供養自行菩薩供養法菩薩供養法身入禪定其身直進從其身邊出無量身化作種種

供養之物滿諸佛世界譬如龍王行時從身
出水普雨天下問曰此諸菩薩欲詣釋迦牟
尼佛何以中道供養諸佛答曰諸佛第一福
曰若供養者得大果報譬如人廣修田業爲
多得穀故諸菩薩見諸佛供養得佛果報是
故供養復次菩薩常敬重於佛如人敬重父
母諸菩薩蒙佛說法得種種三昧種種陀羅
尼種種神力知恩故廣供養如法華經中藥
王菩薩從佛得一切變現色身三昧作是思
惟我當云何供養佛及法華三昧即時飛到

天上以三昧力雨七寶華香幡蓋供養於佛
出三昧已意猶不足於千二百歲服食衆香
飲諸香油然後以天白氎纏身而燒自作誓
言使我身光明照八十恒河沙等佛世界是
八十恒河沙等世界中諸佛讚言善哉善哉
善男子以身供養是爲第一勝以國財妻子
供養百千萬倍不可以譬喻爲比於千二百
歲身然不滅復次是供養佛得無量名聞福
德利益諸不善事皆悉滅除諸善根得增長
今世後世常得供養報久後得作佛如是供

養佛得種種無量利以是故諸菩薩供養佛
經持諸華香瓔珞末香澤香燒香塗香衣服
幢蓋向釋迦牟尼佛所到已頭面禮佛足一
面立

論問曰應言禮何以名頭面禮足答曰人身
中第一貴者頭十一五情所著而最在上故足第
一賤履不淨處最在下故是故以所貴禮所
賤貴重供養故復次有下中上禮下者揖中
者跪上者稽首頭面禮足是上供養以是故
佛毗尼中下座比丘兩手捉上座兩足以頭

面禮問曰四種身儀若坐若立若行若卧何
以故一面立答曰為來故不應行為恭敬供
養故不應卧此事易明何足問耶應問或坐
或立坐者於供養不重立者恭敬供養法重
復次佛法中諸外道出家及一切白衣來到
佛所皆坐外道他法輕佛故坐白衣如客是
故坐一切五衆身心屬佛是故立若得道諸
阿羅漢如舍利弗目連須菩提等所作已辦
是故聽坐餘雖得三道亦不聽坐大事未辦
結賊未破故譬如王臣大有功勳故得坐是

諸菩薩中雖有白衣以從遠來供養佛故立
 經白佛言寶積如來致問世尊少惱少患與
 居輕利氣力安樂不又以此千葉金色蓮華
 供養世尊

論問曰寶積佛一切智何以方問訊釋迦牟

佛十

十三

尼佛少惱少患與居輕利氣力安樂不答曰
 諸佛法爾知而故問如毗尼中達貳迦比丘
 作赤色瓦窟佛見已知而故問阿難此作何
 物阿難白佛是陶家子出家字達貳迦作小
 草舍常為放牛人所壞三作三破是故作此

瓦舍佛語阿難破此瓦窟何以故外道輩當
 言佛大師在時漏處法出如是等處處知而
 故問復次佛雖一切智隨世界法世人問訊
 佛亦問訊佛人中生受人法寒熱生死與人
 等問訊法亦應等復次世界中大貴大賤不
 應相問訊佛力等故應相問訊復次是多寶
 世界清淨莊嚴佛身色像光明亦大若不問
 訊人謂輕慢又復欲示佛世界身色光明種
 種雖勝智慧神力俱等無異是故問訊問曰
 何以問少惱少病不答曰有二種病一者外

因緣病二者內因緣病外者寒熱飢渴兵刃
刀杖墜落推壓如是等種種外患名為惱內
者飲食不節卧起無常四百四病如是等種
種名為內病如此二病有身皆苦是故問少
惱少患不問曰何以不問無惱無病而問少
惱少患答曰聖人實知身為苦本無不病時
何以故是四大合而為身地水火風性不相
宜各各相害譬如疽瘡無不痛時若以藥塗
可得少差而不可得愈人身亦如是常病常
治治故得活不治則死以是故不得問無惱

無病外患常有風雨寒熱為惱復有身四儀
坐卧行住久坐則極惱久卧久住久行皆惱
以是故問少惱少患問曰問少惱少患則足
何以復言興居輕利答曰人雖病差未得平
復以是故問興居輕利問曰何以故言氣力
安樂不答曰有人病差雖能行步坐起氣力
未足不能造事施為携輕舉重故問氣力安
樂不者有人雖病得差能舉重携輕而未受
安樂是故問安樂不問曰若無病有力何以
未受安樂答曰有人貧窮恐怖憂愁不得安

樂以是故問得安樂不復次有二種問訊法
 問訊身問訊心若言少惱少患興居輕利氣
 力是問訊身若言安樂不是問訊心種種內
 外諸病名為身病媿欲瞋恚嫉妬慳貪憂愁
 怖畏等種種煩惱九十八結五百纏種種欲
 願等名為心病是二病問訊故言少惱少病
 興居輕利氣力安樂不問曰人問訊則應爾
 諸天尚不應如此問訊何況於佛答曰佛身
 二種一神通變化身二父母生身父母生身
 受人法故不如天是故應如人法問訊問曰

一切賢聖心無所著不貪身不惜壽不惡死
 不悅生若如是者何用問訊答曰隨世界法
 故受人法問訊遣問訊亦以人法千葉金色
 蓮華如上說

經爾時釋迦牟尼佛受是千葉金色蓮華已

散東方如恒河沙等諸世界中佛

佛十

十五

論問曰佛無勝如今何以故向東方諸佛散
 華供養如佛初得道時自念人無所尊則事
 業不成今十方天地誰可尊事者我欲師而
 事之是時梵天王等諸天白佛佛為無上無

過佛者佛亦自以天眼觀三世十方天地中
無勝佛者心自念言我行摩訶般若波羅蜜
今自致作佛是我所尊即是我師我當恭敬
供養專事是法譬如樹名爲好堅是樹在
地中百歲枝葉具足一日出生高百丈是樹
出已欲求大樹以蔽其身是時林中有神語
好堅樹言世中無大汝者諸樹皆當在汝蔭
中佛亦如是無量阿僧祇劫在菩薩地中生
一日於菩提樹下金剛坐處坐實知一切諸
法相得成佛道是時自念誰可尊事以爲師

者我當承事恭敬供養時梵天王等諸天白
佛言佛爲無上無過佛者今何以故復供養
東方諸佛答曰佛雖無上三世十方天地中
無過佛者而行供養供養有上中下下於已
者而供養之是下供養供養勝已上供養
供養與已等者是中供養諸佛供養是中供
養如大愛道比丘尼與五百阿羅漢比丘尼
一日中一時入涅槃是時諸得三道優婆塞
舉五百床四天王舉佛乳母大愛道床佛自
在前擎香爐燒香供養佛語比丘汝等助我

供養乳母身爾時諸阿羅漢比丘各各以神
 足力到摩梨山上取牛頭栴檀香薪助佛作
 積是為下供養以是故雖不求果而行等供
 養復次唯佛應供養佛餘人不知佛德如偈
 說

智人能敬智 神十 智論則智喜 十六 智人能知智

如蛇知蛇足

以是故諸佛一切智能供養一切智復次是
 十方佛世世勸助釋迦牟尼佛如七住菩薩
 觀諸法空無所有不生不滅如是觀已於一

切世界中心不著欲放捨六波羅蜜入涅槃
 譬如人夢中作棧渡大河水手足疲勞生患
 獸想在中流中夢覺自念言何許有河而可
 渡者是時勤心都放菩薩亦如是立七住中
 得無生法忍心行皆止欲入涅槃爾時十方
 諸佛皆放光明照菩薩身以右手摩其頭語
 言善男子勿生此心汝當念汝本願欲度衆
 生汝雖知空衆生不解汝當集諸功德教化
 衆生莫入涅槃汝未得金色身三十二相八
 十種隨形好無量光明三十二業汝今始得

一無生法門莫便大喜是時菩薩聞諸佛教
誨還生本心行六波羅蜜以度衆生如是等
初得佛道時得是佐助又佛初得道時心自
思惟是法甚深衆生愚蒙薄福我亦五惡世
生念當云何念已我當於一法中作三分分
爲三乘以度衆生作是思惟時十方諸佛皆
現光明讚言善哉善哉我等亦在五惡世中
分一法作三分以度衆生是時佛聞十方諸
佛語聲即大歡喜稱言南無佛如是十方佛
處處勸助爲作大利知恩重故以華供養十

方佛最上福德無過此德何以故是華寶積
佛功德力所生非是水生華普明是十住法
身菩薩選此華來上釋迦牟尼佛釋迦牟尼
佛知十方佛是第一福田故以供養是福倍
多何以故佛自供養佛故佛法中有四種布
施一施者清淨受者不淨二施者不淨受者
清淨三施者清淨受者亦淨四施者不淨受
者不淨今施東方諸佛是爲二俱清淨是福
最大以是故佛自供養十方佛問曰一切聖
人不受報果後更不生云何言是施福最大

答曰是福雖無人受其相自大若有人受者其報無量諸聖人知有為法皆無常空故捨入涅槃是福亦捨譬如燒金丸雖眼見其好不可以手觸燒人手故復次如人有瘡則須藥塗若無瘡者藥無所施人有身亦如是常為飢渴寒熱所逼亦如瘡發以衣被飲食温煖將適如藥塗瘡如愚癡人為貪藥故不用塗瘡若其無瘡藥亦無用諸佛以身為瘡捨放身瘡故亦不受報藥以是故雖有大福亦不受報

經所散蓮華滿東方如恒河沙等諸佛世界論問曰華少而世界多云何滿答曰佛神通力故如上八種自恣變化法大能令小小能令大輕能令重重能令輕自在無礙隨意所到能動大地所願能辦諸大聖人皆得是八種自在是故佛能以小華滿東方如恒河沙等世界又復以示衆生未來福報如此少華滿東方世界又勸東方菩薩言植福於佛田中所得果報亦如此華彌滿無量汝雖遠來應當歡喜遇此大福田果報無量

經一華上皆有菩薩結跏趺坐說六波羅蜜聞此法者必至阿耨多羅三藐三菩提

論問曰上佛以舌相光明化作千葉寶華一

一華上皆有坐佛今何以故一一華上皆有坐菩薩答曰上是佛所化華故有坐佛此是

普明菩薩所供養華是故有坐菩薩復次上諸眾生應見坐佛得度今此眾生應見坐菩薩得度結跏趺坐說六波羅蜜聞此法者必至阿耨多羅三藐三菩提如先說

經諸出家在家菩薩及諸童男童女頭面禮

釋迦牟尼佛足各以供養具供養恭敬尊重讚歎釋迦牟尼佛

論是諸出家在家菩薩及諸童男童女各

以善根福德力故得供養釋迦牟尼多陀阿伽度阿羅訶三藐三佛陀如說偈

諸聖所來道佛亦如是來實相及所去佛亦如是來

佛亦爾無異諸聖如實語佛亦如實說

以是故名佛多陀阿伽度忍鎧心堅固

精進弓力強智慧箭勁利破憍慢諸賊

應受天世人一切諸供養以是故名佛

以為阿羅訶	正知苦實相	亦實知苦集
知苦滅實相	亦知苦滅道	真正解四諦
定實不可變	是故十方中	號三藐三佛
得微妙三明	清淨行亦具	是故號世尊
鞞闍遮羅那	解知一切法	自得妙道去
或時方便說	慳念一切故	滅除老病死
令到安隱處	以是故名佛	以為修伽陀
知世所從來	亦知世滅道	以是故名佛
為路迦鞞陀	禪戒智等眼	無及況出上
以是故名佛	為阿耨多羅	大悲度衆生

輒善教調御 以是故名佛 富樓沙曇藐
 智慧無煩惱 說最上解脫 以是故名佛
 提婆摩菟舍 三世動不動 盡及不盡法
 道樹下悉知 是故名為佛
 索方度如恒河沙等諸佛世界其世界最
 在邊世界名離一切憂佛號無憂德菩薩名
 離憂西方度如恒河沙等諸佛世界其世界
 最在邊世界名滅惡佛號寶山菩薩名義意
 北方度如恒河沙等諸佛世界其世界最在
 邊世界名勝佛號勝王菩薩名得勝下方度

如恒河沙等諸佛世界其世界最在邊世界名善佛號善德菩薩名華上上方度如恒河沙等諸佛世界其世界最在邊世界名喜佛號喜德菩薩名德喜如是一切皆如東方

問曰如佛法中實無諸方名何以故諸五

十

十

衆十二入十八界中所不攝四法藏中亦無說方是實法因緣求亦不可得今何以故此中說十方諸佛十方菩薩來答曰隨世俗法所傳故說方求方實不可得問曰何以言無方汝四法藏中不說我六法藏中說汝衆入

界中不攝我陀羅驃中攝是方法常相故有相故亦有亦常如經中說日出處是東方日沒處是西方日行處是南方日不行處是北方日有三分合若前合若今合若後合隨方日分初合是東方南方西方亦如是日不行處是無分彼間此此間彼是方相若無方無彼此彼此是方相而非方答曰不然須彌山在四域之中日繞須彌照四天下鬱怛羅越日中是弗婆提日出於弗婆提人是東方弗婆提日中是閻浮提日出於閻浮提人是東

方是實無初何以故一切方皆東方皆南方皆西方皆北方汝言日出處是東方日行處是南方日沒處是西方日不行處是北方是事不然復次有處日不合是為非方無方相故問曰我說一國中第十一方相汝以四國為難以是故東方非無初第十二答曰若一國中與東方合是為有邊有邊故無常無常故是不遍以是故方但有名而無實

經爾時是三千大千世界皆成為寶華遍覆地懸繒播蓋香樹華樹皆悉莊嚴

論問曰此誰神力令地為寶答曰是佛無量神力變化所為有人呪術幻法及諸鬼神龍王諸天等能變少物令三千大千世界皆為珍寶餘人及梵天王皆所不能佛入四禪中十四變化心能令三千大千世界華香樹木一切土地皆悉莊嚴一切衆生皆悉和同心轉為善何以故莊嚴此世界為說般若波羅蜜故亦為十方諸菩薩客來及諸天世人故莊嚴如人請貴客若一家請則莊嚴一家一國主則莊嚴一國轉輪聖王則莊嚴四天下

梵天王莊嚴三千大千世界佛為十方無量
恒河沙等諸世界中主是諸他方菩薩及諸
天世人客來故亦為此彼衆人見此變化莊
嚴則生大心生清淨歡喜心從大心發大業
從大業得大報受大報時更生大心如展

轉增益得成阿耨多羅三藐三菩提以是故
變此世界皆悉為寶云何名寶寶有四種金
銀毗瑠璃玻瓈更有七種寶金銀毗瑠璃玻
瓈磲磔碼碯赤真珠此珠極貴非珊瑚也更復有寶摩
羅伽陀此珠金翅鳥口邊出綠色能辟一切毒也因陀尼羅珠天青

摩訶尼羅珠天青鉢摩羅伽珠赫光越閣剛龍珠
如意珠玉貝珊瑚琥珀等種種名為寶是寶
有三種有人寶天寶菩薩寶人寶力少唯有
清淨光色除毒除鬼除暗亦除飢渴寒熱種
種苦事天寶亦大亦勝常隨逐天身可使令
可共語輕而不重佛十菩薩寶勝於天寶能兼有
人寶天寶事又能令一切衆生知死此生彼
因緣本末譬如明鏡見其面像復次菩薩寶
能出種種法音若為首飾寶冠則兩十方無
量世界諸佛上幢幡華蓋種種供養之具以

供養佛又雨衣被卧具生活之物種種衆事
 隨衆生所須皆悉雨之給施衆生如是等種
 種衆寶以除衆生貧窮苦厄問曰是諸珍寶
 從何處出答曰金山石沙赤銅中真珠出
 魚腹中竹中蛇腦中龍珠出龍腦中珊瑚出
 海中石樹生貝出蟲甲中銀出燒石餘瑠璃
 玻瓈等皆出山窟中如意珠出自佛舍利若
 法沒盡時諸舍利皆變爲如意珠譬如過千
 歲氷化爲玻瓈珠如是等諸寶是人中常寶
 佛所莊嚴一切世界是最殊勝諸天所不能

得何以故是從大功德所生種種華幡如先
 說香樹者名阿伽樓樹香多伽樓樹香栴檀
 如是等種種香樹華樹名瞻蔔樹花阿輸迦
 花無憂婆訶迦羅樹花如是等種種華樹
 經譬如華積世界普華世界妙德菩薩善住
 意菩薩及餘大威神諸菩薩皆在彼住
 論問曰何以言譬如華積世界答曰彼世界
 常有淨華此世界變化一時故以喻也譬喻
 法以小喻大如人面好譬如滿月問曰更有
 十方諸清淨世界如阿彌陀佛安樂世界等

何故但以普華世界爲喻答曰阿彌陀佛世界不如華積世界何以故法積比丘佛雖將至十方觀清淨世界功德力薄不能得見上妙清淨世界以是故世界不如復次當佛變化此世界時正與華積世界相似以是故言譬如華積世界問曰更有餘大菩薩如毗摩羅結觀世音遍吉菩薩等何以不言此諸菩薩在彼住而但言文殊尸利善住意菩薩答曰是遍吉菩薩一一毛孔常出諸佛世界及諸佛菩薩遍滿十方以化衆生無適住處文

殊尸利分身變化入五道中或作聲聞或作緣覺或作佛身如首楞嚴三昧經中說文殊尸利菩薩過去世作龍種尊佛七十二億世作辟支迦佛是可言可說遍吉菩薩不可量不可說住處不可知若住應在一切世界中住是故不說復次及諸大威神菩薩亦應總說遍吉等諸大菩薩

經爾時佛知一切世界若天世界若魔世界若梵世界若沙門婆羅門若天若提闍婆人阿脩羅等及諸菩薩摩訶薩紹尊位者皆集

論問曰佛神力無量一切十方衆生若盡來在會者一切世界應空若不來者佛無量神力有所不能答曰不應盡來何以故諸佛世界無邊無量若盡來者便爲有邊又復十方各各有佛亦說般若波羅蜜如般若波羅蜜四十三品中十方得十方面各千佛現皆說般若波羅蜜以是故不應盡來問曰若有十方諸佛皆說般若波羅蜜十方諸菩薩何以故來答曰如普明菩薩來章中已說與釋迦牟尼佛因緣故來復次是諸菩薩本願故若有說般

若波羅蜜處我當聽受供養是以遠來欲以身力積功德故亦以示諸衆生我從遠來供養法故云何汝在此世界而不供養問曰佛於法不著何以故七現神力而令衆生大集答曰是般若波羅蜜甚深難知難解不可思議是故廣集諸大菩薩令新發意者心得信樂譬如小人所語不爲人信貴重大人人必信受問曰何以故言若天世界若魔世界若梵世界但應言天世界人世界則足何以故十號中言天人師以是故應言天人而已答

曰諸天有天眼天耳利根智慧多自知來以是故言天世界問曰若天世界已攝魔梵何以別說若魔若梵答曰天中有三天主釋提婆那民二處天主魔王六欲天主梵世界中梵天王為主問曰如夜摩天兜率陀天化樂天皆有主何以但有三天答曰釋提婆那民依地住佛亦依地住常來佛所大有名稱人多識故魔王常來燒佛又是一切欲界中主夜摩天兜率陀天化樂天皆屬魔王復次天世界則三界天皆攝是天中一切欲界魔爲

主是故別說復次魔常燒佛今來聽般若波羅蜜餘人增益信故問曰色界中大有天何以但言梵世界集答曰上諸天無覺觀不喜散心又難聞故梵世界有四識易聞故又梵世界近故復次梵名離欲清淨今言梵世界已總說色界諸天復次餘天未有人民劫初生時梵天王獨在梵宮寂寞無人其心不悅而自生念此間何以不生人民是時光音天命盡者應念來生梵王便自生念此諸天先無隨我念故生我能生此諸天諸天是時亦

各自念我從梵王生梵王是我父也。以是故但說梵世界。復次二禪三禪四禪。天於欲界見佛聽法。若勸助菩薩眼識耳識身識。皆在梵世界中。取以是故。別說梵世界。問曰。何以故獨說諸沙門婆羅門。不說國王及長者諸餘人。衆答曰。智慧人有二分。沙門婆羅門出家名沙門。在家名婆羅門。餘人心存世樂。是故不說婆羅門。多學智慧。求福出家人。一切求道是故。但說沙門婆羅門。在家中七世清淨。生滿六歲。皆受戒名婆羅門。是沙門婆羅

門中有道德智慧。以是故說。問曰。先以說天世界。今何以復說天。答曰。天世界是四天王。忉利天。魔是他化自在天。梵是色界。今說天。是欲界中。夜摩兜率陀化樂愛身天等。愛身在六天上。形色絕妙。故言愛身。問曰。何以但說捷闍婆。不說諸餘鬼神及龍王。答曰。是捷闍婆。是諸天。天人隨逐。諸天其心柔輒。福德力小。減諸天。諸鬼神。鬼神道中。攝龍王畜生道中。攝甄陀羅。亦是天。妓皆屬天。與天同住。共生飲食。妓樂皆與天同。是捷闍婆王名童

籠磨樹言是捷闍婆甄陀羅恒在二處住常
所居止在十寶山間有時天上為諸天作樂
此二種常畚休上下人在四天下生生有四
種極長壽乃至無量歲極短壽乃至十歲阿
脩羅惡心鬪諍而不破戒大修施福生在大
海邊住亦有城郭宮殿是阿脩羅王名毗摩
質多婆梨羅睺羅如是等名阿脩羅王如說
一時羅睺羅阿脩羅王欲瞰月月天子怖疾
到佛所說偈

大智精進佛世尊 我今歸命稽首禮

是羅睺羅惱亂我 願佛憐愍見救護
佛與羅睺羅而說偈言

月能照暗而清涼 是虛空中天燈明

其色白淨有千光 汝莫吞月疾放去

是時羅睺羅怖懷流汗即疾放月波梨阿脩

羅王見羅睺羅怖惶怖放月說偈問曰廿七

汝羅睺羅何以故 惶怖戰慄疾放月

汝身流汗如病人 心怖不安乃如是

羅睺羅爾時說偈答曰

世尊以偈而勅我 我不放月頭七分

設得生活不安隱 以故我今放此月

波利阿脩羅王說此偈言

諸佛甚難值 久遠乃出世 說此清淨偈

羅睺即放月

問曰何以不說地獄畜生餓鬼答曰地獄大

苦心亂不能受法畜生愚癡覆心不能受化

餓鬼為飢渴火燒身故不得受法復次畜生

餓鬼中少多有來聽法者生福德心而已不

堪受道是故不說問曰若爾者捷闍婆阿脩

羅亦不應說何以故鬼神道中已攝故答曰

佛不說攝今何以言攝此是迦旃延子等說

如阿脩羅力與天等或時戰鬥勝天捷闍婆

是諸天妓與天同受福樂有智慧能別好醜

何以故不得受道法如雜阿舍天品中說富

那婆藪鬼神母佛遊行宿其處爾時世尊說

上妙法甘露女男二人啼泣母為說偈止之

汝鬱怛羅勿作聲 富那婆藪亦莫啼

我今聞法得道證 汝亦當得必如我

以是事故知鬼神中有得道者復次摩訶衍

中密迹金剛力士於諸菩薩中勝何況餘人

如屯嶮摩甄陀羅王捷闍婆王至佛所彈琴
 讚佛三千世界皆為震動乃至摩訶迦葉不
 安其坐如此人等云何不能得道如諸阿脩
 羅王龍王皆到佛所問佛深法佛隨其問而
 答深義何以言不能得道問曰於五道衆生
 中佛是天人師不說三惡道以其無福無受
 道分故是諸龍鬼皆墮惡道中答曰佛亦不
 分明說五道說五道者是一切有部僧所說
 婆蹉佛妬路部僧說有六道復次應有六道
 何以故三惡道一向是罪處若福多罪少是

名阿脩羅捷闍婆等生處應別以是故應言
 六趣復次三惡道亦有受道福少故言無及
 諸菩薩紹尊位者如先說

大智度論卷第十

音釋

縫符容切 衽汝禁切 毳專切 翼從切
 從才仲切 疰七余切 積資四切 勁居正切
 侍從也 疰癩也 蓄蒲北切 鞞苦吉切 懷其據切
 也 慄良質切 嶮嶮也 嶮嶮也 嶮嶮也 嶮嶮也
 也 慄良質切 嶮嶮也 嶮嶮也 嶮嶮也

永樂北藏

大智度論

第九二册